

Alles nor e Gericht!

Hosde schunn geheert? De Schorsch hott mich om Freidaach uffem Markt getroffe unn wollt merr gleich e Neiichkeit verzähle.

Ei was dann, Schorsch?, habb ich gefroocht.

De Schorsch guckt sich um obs aach koon onnern heern dut: Vom Fritz soiner Fraa? Hosdes noch nit geheert? Die Else soll enn onnern hawwe. De Fritz kann doch nimmi so fort unn doo war die alloons uffere Schiffsreis unn doo häddse enn onnern kennegelernt. Awwer Schorsch, habb ich gemoont, uffem Schiff lernt merr halt onnern Leit kenne. Was issen doo debei?

De Schorsch gibt zu Ontwort: Im allgemeine nix. Awwer wennse von de Reis nit hoom-kimmt? Unn dess in dere ihm Alder – die iss doch schunn fünfunnferrzich Jahr mettem Fritz verheirat. Awwer de Else habb ich nie getraut. Weil dere ihr Mudder war genauso, die hott aach immer onnern Kerle gehabt. De Appel fällt nit halt nit weit vom Stomm.

Ich frooch: Unn was macht de Fritz?

De Karl flistert: Der hätt beim Graulich nooch Strick geguckt, der wollt sich uffhänge. In dem Aacheblick kimmt de Karl mettem Korb in de Hond die Fleschgass erunner unn wie der uns gesehe hott, kimmdere direkt uff uns zu unn ohne Gemoie gesacht ze hawwe rufder: Habbders schunn geheert vom Fritz unn soiner Fraa?

De Schorsch hott grad soin Mund uffmache wolle, awwer ich habb schnell gefroocht: Ei was issen mett dene, Karl?

De Karl guckt sich noch nit emol um obs aach koon onnern heern dut: Die Else hott enn onnern, den se im Urlaub kennegelernt hott unn jetz isse schunn mett dem uffere Schiffsreis. De Fritz werdd gesucht, weil der hatt e Wäscheloi in de Hond alser ins Audo iss, der will sich uffhänge. Weeche der det ich mich nit uffhänge!

In dem Aacheblick kimmt de Helmut oogerennt unn rief: Sie hawwen gefunne, im Flerschemer Wald hawwe se de Fritz vonem Bucheboom geschnitte. Unn alles weeche dere Else! Ich habbs schunn immer gewusst dass die nix daucht.

Grad als ich de Kopp schittel vor so vill Uuglick kimmt de Fritz unn soi Fraa iwwer de Zebraastreife. Die zwaa hawwe Gude gesacht, die Else iss on die Ständ gonge unn de Fritz hott sich zu uns gestellt unn hott uns gefroocht: Habbers schunn geheert, ich habb mich uffgehängt.

Mir vier hawwe zimlich bedröppelt geguckt unn de Karl war de erste der soi Sprooch widder gefunne hott. Weil doi Fraa enn onnern hätt unn mett dem fort wär.

De Fritz hott de Kopp geschittelt: Wer nor so Gerichte in die Welt setzt? Die Else war acht Daach bei unserne Tochter unn weil die uff oomol schwer kronk worrn iss, iss die Else noch drei Woche dort gebliwwe. Unn dann kumme gleich so Dinger uff. Unn was noch schlimmer iss: Seitdem die Else widder dehoom iss, werdd se von de Nachberschaft nimmi oogeguckt. Nix droo unn doch verurteilt, was sachden ihr dezu?

De Schorsch sacht: Alles nor Gerichte!

De Fritz war gonz faltisch um de Mund: Ja, Gerichte unn e Urteil – ausgesproche von Leit von dene merrs nie gedenkt hätt. Awwer ihr habt dess doch bestimmt nit geglaabt von de Else?

Was denksden du von uns, Fritz, hawwe mir vier gerufe, so was glaawe mir doch nit!

Eiern Honnes